

DIKHONFERENSE



Ke go leboga kudu, Ngwanešu Williams. Morena a go šegofatše.

² Mantšiboa a mabotse bagwera. Ke... [Phuthego e opa magoswi—Mor.] Ke a le leboga. Seo se no ntira ke ikwele go amogelega gabedi. Gomme go bose kudu go ba fa ka Arizona bošegong bjo, ka toropongkgolo ye ya Phoenix, le tabarenekele ye ya go ratega le kopanelo ye kaone ye, ye ke lebeletšego pele go tla morago ge e sa le ke be ke le mo la mafelelo.

³ Gomme matšatši a se makae a go feta, e boletšwe feela pele ke eya mošwamawatle gore (Dikgonagalo tša go tla morago Phoenix.), gore ga go le o tee wa baena a bego a etla ka gare nako ye, gabotse, seo ka kgonthe se ntirile ke ikwele gabotse go tseba gore ke tla hwetša go bona bagwera ba ka gape ntle fa. Gomme ge ke be ke sa le ka Puerto Rico, le ka go di—di Dihlakahlake tša Caribbean, gobaneng, morago ge ke bowa, ke kwele nako yeo gore re be re etla ntle fa. Gomme ka nnete e be e le monyetla wo mogolo go tla morago.

⁴ Ka mehla go bonala botse go nna ge ke etla tlase go kgabaganya dithaba, le go bona maganata ale a khukhuša, gomme matšoba a thoma go khukhuša, ka morago ga go lwa le ledimo la lehlwa lebaka la matšatši a mane, gomme morago a gatsela, gomme go tla tlase fa moo go bego go le bose le borutho, e no ba kgwatho ye nnyane ya Legodimo. Moedi wo ka mehla o bile le kgogedi go nna ge e sa le ke le mošemane yo monnyane. Ke elelwa ketelo ya ka ya mathomo ka Phoenix, ke be ke no ba e ka ba, gabotse, ke be ke le e ka ba lesometshela, bogolo bja mengwaga ye lesomešupa, e bile e ka ba mengwaga ye masometharo ya go feta.

⁵ Gomme godimo ka Sixteenth le Henshaw e be e le leganata, fao ke mo ke dutšego, godimo, feela thwi ntle go tsela ya kgale ya magaeng. Ke otletše go theoga go bapa le foro ya go nošetša go tla ka Phoenix, ke ka mokgwa wo ke theogilego go tšwa Tseleng ya Henshaw go tla ka Phoenix, ya lekgwara yohle, feela tsela ya kgale, ya lekgwara go tla fa. Ka nnete, go fetogile.

⁶ Gomme batho ba ba fetogile, moedi o fetogile, Phoenix e thoma bjale ka Magahlanong a Apache, e tla ka tsela ye. E tla tšwelapele go fetoga ge nako e eya pele. Gomme yeo ke tsela ye re hwetšago se sengwe le se sengwe ka bophelong, se a fetoga. Ke hweditše feela Selo se tee seo se sa fetogego, yoo ke Modimo, ga A fetoge. Ke Mo hweditše e ka ba mengwaga ye masometharo ya go feta, ke be ke Mo tšhabela ge ke etla Phoenix. Eupša ga go bohlokwa bja go Mo tšhabela, O tseba mo o lego.

7 Gomme kafao gona, eupša Yena ga se nke a fetoga gomme ga se nke a šitwa go dula a le Mophološi wa go swana wa go rata, yo bose yoo ke nago le yena, yoo ke mo hweditšego. Selo se nnoši ka go nna, go no bonala o ka re O ba go ratega kudu go nna letšatši le lengwe le le lengwe, ge le feta, gobane ke batamela feela kgauswana go Yena. Bophelo bja ka bo a fela, gomme ga ke mošemane yo monnyane ke bego ke le yena mengwaga e se mekae ya go feta, eupša go na le dikholofelo di tee tše kgolo tšeo ke nago le tšona, tšeo letšatši le lengwe go boela morago go bjoogape, feela ka bophelo bjo bo sa hwego, go se tšego ka hwa.

8 Matšatši a se makae a go feta, goba nako ye nngwe ya go feta, nka no re, ke be ke kama meriri e se mekae ke bilego le yona e šetšego, mogatšaka o rile go nna, o rile, “Billy, o nyakile go ba hlogo ya lefatla.”

9 Ke rile, “Ee.” E hlotšwe go thoma ke mokeri yo a beilego esiti ya khaboliki godimo ga moriri wa ka, gomme ohle o foforegile, gomme ka gona ga se nke wa hlwa o hloga gabotse. Ke rile, “Eupša, Hani, ke nyaka go go botša, ga se ka lahlegelwa ke o tee wa yona.”

O rile, “Ke a rapela, mpotše moo e lego?”

Ke rile, “Gabotse, ke tla go araba ge o ka nkaraba.”

O rile, “Go lokile.”

10 Ke rile, “E be e le kae pele ke e hwetša? E be e tlamegile go ba kgonthe, felotsoko. Gomme kae kapa kae e bego e le gona pele ke e amogela, e kua e ntetetše go tla go yona.” Letšatši le lengwe wo . . . Yeo ke nnete tlwa. Ga go moriri o tee wa hlogo ya rena, eupša wo o nomorilwego. Modimo o tseba tšohle ka wona.

11 Ke dutše ntle lebakana la go feta ke lebeletše ntle go Thaba ya Camelback gomme ka elelwa bjalo ka mošemane yo monnyane ke nametše pere ntle kua. Go tloga, ke be ke šoma godimo fa ka godimo ga Wickenburg, ke ile godimo le bona go theoša dikgomo. Gomme ka mehla ke be ke makala bjang, ge nka tšogo ka bona nako yeo ke bego nka tšogego ka ba mošemane yola wa mengwaga ye lesomešupa, ye lesomeseswai gape, eupša Lentšu la Modimo le ruta gore ke tla ba. Ga go selo seo Modimo a se lobago, O tla se tšoša gape ka letšatši la mafelelo, O tshepišitše seo, Jesu o dirile.

12 Gomme ka gona rena . . . Go tseba gore bophelo bjo ga go kgathale gore eng kapa eng e direga ka bophelong bjo, magae a rena ohle, toropokgolo ya rena ye kgolo, setšhaba sa rena se sekaone, naga ye kaone ye ya Cali- . . . , uh, bokaone ke se bolele seo, a ke bile? Ditokelo tša meetse le tšona di . . . Arizona ke, e tla nyamalala le go tloga letšatši le lengwe, magae ohle a rena ka moeding wo a tla ba lerole gape. Eupša disoulo tša rena di ne go se hwe ge re tšwetšwe gape ka Moya wa Modimo.

13 Modimo o tshepišitše go re tsoša gape mo letšatšing la mafelelo ka Morwa wa Gagwe Jesu Kriste, gomme morago re tla ba ba baswa go ya go ile, re ka se tsoge ra swanela go babja gape, re ka se tsoge ra ba le mahloko a pelo goba manyami. A nako e tla bago! Ge A boletše ka go Dikutollo 21, “Ke bone Magodimo a maswa le lefase le leswa, gobane Legodimo la pele le lefase la pele di fetile; gomme go be go se sa na le lewatle.” Leo ke Lona re hlologetšego go ya go lona, re katana go ya go lona.

14 Gomme go dikologa lefase, ge ke eya go rerela batho, go rapelela malwetši le ditlaišego tša bona, go kopana le baena ba ka ba bakaone ba kereke ye nngwe le ye nngwe le kerekeleina ye nngwe le ye nngwe, ke na le kopanelo ye kgolo, ke—ke lebeleletše pele go nako ge ke tla kopana le bona go se tsoge ka re šalang gabotse gape.

15 Lehono ke be ke eme ka go Cafeteria ya Miller, gomme monna yo a bego a hlokomela dijo morago kua o ntsebile. Nako yeo mošemane wa waetere o rile, “Dumela, Ngwanešu Branham.” Ke dutše fase, gomme ke kopane le mogwera wa ka, Ngwanešu le Kgaetšedi Norman le batho ba bona go tšwa Tucson. Mo dinakwaneng di se kae monna mogolo le mosadi ba tla godimo, gomme mohumagadi yo, ge ba itsebiša bonabeng, o be a ešwa Oakland, o tlile godimo, a eya go ba mo bakeng sa kopano, ka kgonagalo ba gona bošegong bjo. Gomme o amogetše, bjalo ka ge ke kwešiša, Moya wo Mokgethwa mengwaga ye mebedi pele ke belegwa. O be a—o be a rera lebaka la mengwaga ye masomenne tee, ke nagana ke yona, Ebangedi. Ge ke bona batho boka bao. . .

16 Gomme o rile, “Go ne selo se nnoši, selo se tee seo se ntshwenyago, ke duma nka tšwela ntle gomme ka tšwelapele go ya.” Nna, ke—ke ikwetše feela e ka ba bogolo *bjola* go emeng hleng le mosadi yola, go nagana ka mokgethwa wa kgale, motšofe gomme sela sohle se sa le ka go yena, se sengwe se a goeletša, “Modimo yo montši, ge nka kgona go Mo direla se sengwe!” Go swanetše go re dira re lewe ke hlong renabeng. Re swanetše go ya thwi ntle ka tšhemong, re thome go direla Morena Jesu se sengwe.

17 Ke nyaka go leboga ngwanaborena yo bohlokwa fa bošegong bjo, le poto ya kereke ye bakeng sa go re laletša, le go re tliša ntle mo gore re kgone go amana le go ba le kopanelo ye kgolo mmogo. Ke tshepa gore Modimo o tla re fa kopano ye kgolo, ke nagana e ka ba matšatši a lesometlhano. Nna, a le ka nkgotlelela botelele bjoo? Yeo e tla ba e ka ba botelele nkilego ka swara kopano ka bophelong bja ka, e tla ba matšatši a lesometlhano, kopano ye teleletelele; ka mehla ke no dula mašego a mararo go ya go a mahlano, gomme ke ile.

18 Re be re le ka Puerto Rico beke ya go feta, goba, beke pele ga ya go feta e bile, ke a dumela. Re be re le ka Kingston, Jamaica, gomme re bile le basokologi ba e ka bago dikete tše tharo bošego

bjo bongwe le bjo bongwe. Gomme re ile Puerto Rico. . . Re bile kua e ka ba mašego a mararo goba a mane, re ile Puerto Rico lebaka la mašego a mabedi, re bile le dikete tše tharo go ya go tše nne bošego bjo bongwe le bjo bongwe kua ba etla go Morena. Gomme ke nna yo ka Phoenix bjale lebaka la matšatši a lesometlhano. Nna! Ke no tshepa gore Morena o tla re direla se sengwe se sengolo.

¹⁹ Gomme ka baka la go tla ga rena mmogo, ke a holofela gore go tla hlola tšošetšo, tšošetšo ya kgonthe godimo ga meedi ka moka ya Maricopa mo, gore go tla ba tšošetšo ka kerekeng ye nngwe le ye nngwe, le mogohle go tla phulega Moya wa Modimo wa lerato, le kwanelo, yeo e tla bago tseleng ya yona go tliša Jesu Kriste Morwa wa Modimo morago lefaseng gape. Godimo ga dikgopolo tšeo, pele ke tšea sehlogo, a re inamišeng dihlogo tša rena bakeng sa lentšu la thapelo.

²⁰ Bjale, pele re rapela, a go ka ba e ka ba mang a ka ratago go gopolwa ka thapelong ye? Ge ba ka dira, e no phagamišetšang diatla tša lena godimo go Modimo, ka gare goba ka ntle, O a bona le go kwešiša. Boloka kgopolo ya gago ka monaganong wa gago bjale ge re rapela.

²¹ Tate wa rena le Modimo wa mogau kudukudu, Yo a tlišitšego gape Morena Jesu go tšwa bahung, a Mo tšošetšego ka letšatši la boraro, gomme a Mo neela go Kereke bjalo ka Mmoelanyi a nnoši gare ga Modimo le batho, Motho, Kriste Jesu, Yena a re tlogeletšego tshepišo ye ya go makatša kudukudu, gore ge re kgopela Tate e ka ba eng Leineng la Gagwe, O tla re fa yona, e tla fiwa. Kafao re tla pele ga Gago bošegong bjo, Morena Modimo, Leineng la Morena Jesu, Morwa wa Gago, go kgopela gore sa pele O tla re lebalela sebe se sengwe le se sengwe le karogo ye nngwe le ye nngwe yeo re e dirilego kgahlanong le Wena.

²² Gomme ge re dirile sebe kgahlanong le ngwanaborena, goba kgahlanong le moagišani wa rena, goba e ka ba mang, a nke Moya wo Mokgethwa o utolle seo go rena mo mathomong a tšošetšo ye, gore re ke re ye gomme re lokiše dilo tše, gore re ke re be le dipelo tša go hlweka, le diatla tša go hlweka, le letswalo le le sa tšhilafatšwago pele ga Gago, gore Wena o kgone go re roma go bahloki, bao ba sa išego felo ka Modimo. Bopaki bja rena bo ka se šitišwe, eupša Moya wo Mokgethwa wo mogolo o tla ya pele ga rena gomme wa re thuša go tliša batho go Morena Jesu.

²³ Re a kgopela Morena, gore O tla šegofatša kereke ye, le modiša wa yona, le poto ya yona, le maloko a yona, šegofatša Mmele wa Kriste woo o lego ka moeding fa, maloko a kereke ye nngwe le ye nngwe. Gomme ga re rapelele feela kereke ye, eupša bakeng sa tšohle, gore go tla tla tšošetšo ye kgolo, le gore letago la Modimo le ke le ikwelwe go kgabola moedi, gomme e sego feela go kgabola moedi, eupša go dikologa ditšhaba, le go tliša Morena Jesu, ge re bona nako e batamela.

24 Re tla kgopela, Morena, go gopola bao ba babjago le go tlaišwa, ba ba tswaleletšwego ntle ka dipetlele bošegong bjo, le magae a ba go welwa ke maruru, le tikologong, a nke Moya wo Mokgethwa wa Gago, Morena, o ba direle ka mogau ka Leina la Morena Jesu.

25 Re fe mogau wa Gago le lerato la Gago, gomme re fe Lentšu la Gago, Morena. A nke Lentšu bošego bjo bongwe le bjo bongwe le bjälwe ka dipelong tša rena, gomme Moya wo Mokgethwa o nošetše go fihla re eba dibopego tša kgonthe tša Modimo, maloko a Mmele wa Gagwe a tšweletšago lerato ka kelo ye bjalo, gore e tla ba letswai kudu go fihla Phoenix yohle e tla nyorelwa go swana le Bakriste bale, ka gore go ngwadilwe ke Morena wa rena, gore O boletše Mantšu a, “Lena le letswai la lefase.” Gomme re a lemoga gore letswai ke tatso ge le kgomana. A nke re phele maphelo a mabjalo go fihla meboya ya rena e tla kgoma ba bangwe, gomme ya ba dira ba hlologe le go ba batho, gomme ba phele bophelo bjoo Moya wo Mokgethwa o bo phelago ka rena.

26 Šegofatša Lentšu la Gago ge re Le bala bošegong bjo. Gomme re a rapela gore O tla Le hloma ka dipelong tša rena. Ka gore re a e kgopela, Leineng la Morena Jesu, Morwa wa Gago. Amene.

27 Re letile, gomme ka gare le ka ntle, le go dikologa maboto, rena re, a tseba se go se rago go ema ka dikrempe. Gomme mohlomongwe go ema nako ye telele pele ditirelo di thoma, kafao bošego bjo bongwe le bjo bongwe ke tla leka go potlaka feela ka pela ka mo nka kgonago. Eupša efela, ke nyaka go fa nako ye ntši go Moya wo Mokgethwa, go dumelela Lentšu go šoma, go tšea lefelo la Lona ka pelong, gore . . .

28 Le a tseba, Bokagosafelego ke nako ye telele, ga se bja ke bja thoma goba bo ka se tsoge bja fela. Re rothela fase ka nakong, eupša re tla phagamišetšwa ka go Bokagosafelego le lengwe la matšatši goba mašego a. Gomme go tla beakanya ke legato lefe la bjoo, ka fao re phelago mo, se dipoelo tša rena—tša rena di tla bago kua, kafao a re beng go teba ka kgonthe le tlhokofalo ya nakwana ye nngwe le ye nngwe, gore wo e tla ba molaetša wa mafelelo re ka tsogego ra o kwa ka maphelong a rena.

29 Ke kgethile bakeng sa sehlogo bošegong bjo se se hwetšwago ka Pukung ya Jesaya, tema ya 1, temana ya 18. Gomme feela lebakana, morago ga ge ke e badile, ke a rapela Moya wo Mokgethwa o re fa kgwekgwe ya Lentšu.

Etlang bjale, . . . a re faneng mabaka mmogo, go rialo MORENA: le ge dibe tša lena di le tše khubedu, di tla ba tše tšhweu wa leswele; le ge di ka ba tše khubedu bjalo ka madi, di tla ba tše tšhweu bjalo ka wulu.

30 Ke naganne seo e tla ba selo sa maleba kudu go thoma tirelo ka sona bošegong bjo. Gomme ke nyaka go tšea sehlogo, ge nka se bitša sehlogo, sa *Dikhonferense*.

31 Moprofeta mo o bileditšwe go Modimo, o rile, “Etna, gomme a re fane mabaka mmogo. A re no ba le khonferense.”

32 Re kwele bontši kudu moragwana, mo mengwageng e se mekae ya go feta ka dikhonferense. Gomme dikhonferense ke tša eng? Lebaka la khonferense ke eng? Ka mehla, khonferense e swerwa ka nako ya tšhoganetšo. Ge tšhoganetšo e tsoga, gore bona, madira, goba e ka ba eng e lego, ge e le khonferense ya mohuta woo, gore banna ba bagolo, baetapele ba kgona go tla mmogo gomme—gomme ba neelana dikgopolo tša bona, gomme ba boledišana ka dilo, gomme ba šoma bokaonekaone bjo ba kgonnego bakeng sa bona, bakeng sa, se ba bego ba se šomela, taba, morero.

33 Ba bantši ka mo ba ka kgona go elelwa khonferense ye ke nago le yona ka monaganong bošegong bjo, e bile mengwaga e se mekae ya go feta, ge ba bile le ye ba e biditšego, Khonferense ya Bagolo Ba Bane. Ditšhaba tša go lokologa di be di tlile mmogo le go swara khonferense, ka baka la gore go be go le tšhoganetšo, ka nako yeo Jeremane e be e no ba kgauswi le go thopa Engelane, le lefase, bjalo ka ge go bile, go be go le seemo sa tšhoganetšo.

34 Gomme maatla a Bagolo Ba Bane ba lefase la go lokologa ba kopane mmogo, gomme—gomme ba be ba leka go tla godimo ga kgopolo tsoko, se sengwe seo ba bego ba ka kgona go bea diatla tša bona godimo ga sona, gore ba kgone go fetola leano go—go tseba mokgwa wa go thopa ntwala yela.

35 Ke elelwa modiredi mogwera wa ka o be a le ka Louisville, gomme o be a theeditše dipoelo. Ka mehla ge ba na le khonferense ya mohuta wola, lefase ka moka le be le tsepetše godimo ga dipoelo tša khonferense yela, gobane lefase ka moka le be le amega ka go yona. Ka mehla, ge go se e ka ba eng go kgahlego ya gago go amega ka khonferenseng, gobaneng, ga o kgathale ka yona, eupša a nke o be le kgahlego tsoko ka go yona, gona o nyaka go kwa dipoelo, go kwa se se diregago.

36 Modiredi mogwera yo wa ka o be a theeditše seyalemoya, gomme o be a no tlhetlha le mabato, a theeditše polelo, gomme o rile yo mongwe o kokotile mojakong. Gomme e bile lebakeng la nako yeo ge re be re ne dinako tša makgwakgwa. O be o ka se kgone go ba le swikiri ka kofing, gomme gabotse, re belaetše ka seo, le go swanela go bidiša kofi lekga la bobedi, gomme re belaetše ka seo.

37 Dinako tše dingwe ke a makala ge eba ga re dire go belaela kudu gannyane nthatana. Ge re nagana ka go swanela go bediša kofi gabedi gomme ra belaela ka yona, gomme banna ba ehwa lebaleng, ba baswa, madi a Amerika a tšhollwa lebaleng, gomme madi a ditšhaba a tšhollwa, gomme ka gona re belaela ka boikgafu bjo bonnyane bjoo re swanetšego go bo dira. Go—go bonala ka mokgwa woo, ke a holofela se ga se kwagale phošo, eupša re bonala go ba bontši goba bonnyane batho ba go se

leboge bakeng sa dilo tšeo re nago le tšona. Ga re bee boleng go dilo tše re nago natšo.

³⁸ Gomme modiredi yo o be a tlhetlha le lebato, gomme yo mongwe o kokotile mojakong, o ile mojako'ng go bona se se bego se direga. Gomme go be go le, boka legwaragwara la sebjalebjaale fale, le a tseba, ka maledu a gagwe gohle godimo ga sefahlego sa gagwe, le ditšhila, gomme o rile, “Ke—ke tla rata go bolela le wena lebakana le lennyane.” O rile, “Ke nna moreti, gomme ga go yo a tla rekago theto ya ka, gomme o monna wa khuetšo ka toropongkgolo, gomme ke ikwela gore ge nka . . . o tla be o tla ya tlase gomme wa mpha thomelo ye nnyane, gobaneng, batho ba be ba tla reka theto ya ka.”

³⁹ Gomme o rile, “Monna morategi wa ka, a o ka se tsene gomme wa dula fase nakwana feela?” O rile, “Ke kwa dipoelo tša dipoelo tša Khonferense ya Bagolo Ba Bane.”

⁴⁰ Gomme moisa yo moswa o be a se ne kgahlego ka go khonferense, o be a no ba le kgahlego ka go theto ya gagwe mong. Gomme ebile o be a ka se theetše modiredi, go fihla modiredi a ile a swanela go mo iša mojako, go mo dira a dule mathuding, go fihla a kwele dipoelo, gobane o bone selo se nnoši ka bophelong go yena e bile go rekiša theto ye a e ngwadilego.

⁴¹ Gomme ka gona re ka kgona go nagana ka khonferense ye nngwe, go be go le Khonferense ya Geneva, bohle re elelwa Khonferense ya Geneva, ka fao ba hlaotšego lefelo le lebotse lela. Ke bile fale makga a mmalwa, gomme ka kgonthe ke lefelo le lebotse ka Geneva. Gomme ka go Khonferense ya Geneva, gomme dipoelo tša khonferense yela . . .

⁴² Gomme ka gona kgauswana, Khonferense ya Paris, re elelwa Khonferense ye kgolo ya Paris, mmaraka wo mongwe wo mogolo, wa histori. Gomme ka gona bjale, morategi wa rena Mopresitente Dwight Eisenhower, o etetše lefase la go lokologa, khonferense, ka morago ga khonferense, ka morago ga khonferense. Khrushchev, le yena o ka ntle, khonferense, ka morago ga khonferense, ka morago ga khonferense.

⁴³ Gobaneng? Gobane go lebega o ka re go na le seemo sa tšhoganetšo se se tlogo pele. Lefase le ka sebopegong se sebjalo go fihla setšhaba e ka ba sefe se sennyane se ka senya lefase ka moka. Banna ba, ba fihleletše ka borasaense ba gagwe, ka diphathišišo tša gagwe tša saense, gomme o fihlile bokagodimo ga lerole la sethunya le gase ya mpholo, o tsene ka go dipomo tša haetrotšene, le dibetša tša nyuklea, le go ya pele, gore ba ka kgona go kukutlolla sekepe sa ka fase ga meetse go tšwa lewatlengkgolo, felotsoko, gomme ba senya lefase. Gomme yo mongwe le yo mongwe o a boifa, ke ka baka leo ba swerego dikhonferense, ba leka go tla mmogo le go hwetša se re swanetšego go se dira.

44 Modimo le yena o ne dikhonferense. Modimo o swera dikhonferense ge tšhoganetšo e tsoga. A re lebeleleng ka go tše dingwe tša dikhonferense tšela. Ya mathomo ye nka kgonago go e bitša ge tšhoganetšo e tsoga, e bile re tla e bitša Khonferense ya Edene. Ge lentšu le fihlile Legodimong gore bana ba Modimo ba be ba wele, ka pela go bile se sengwe se ilego sa swanela go dirwa, gobane morwa wa Gagwe Mong le morwedi wa Gagwe Mong ba be ba wele go tloga mogaung. Gomme go bile le taba ka legatong la tšhoganetšo, ge motho a ka tsoge a ba gona, go be go swanetše go ba se sengwe se dirwago.

45 Ke kgona go eleletša Modimo Tate wa rena tlase ka serapeng sa Edene a lebeletše go dikologa go hwetša mohlare wo o itšego, go fao A bego a ka kgona go biletša bana ba Gagwe godimo ka Bogoneng bja Gagwe ka tlase ga mohlare wo. O hlaotše lefelo. Gomme O biditše khonferense yela. Gomme O emišitše Adama, le Efa, le sephente, gomme go bile le khonferense ye e swerwego. Ba be ba tshetše melao ya Gagwe, gomme melao ya Gagwe e be e lokile, gomme go swanetše, kotlo e swanetše go patelwa.

46 Gomme ba ya go phela bjang ka morago ga ge kahlolo ya lehu e lekelela godimo ga bona? Gomme go bile le khonferense ye e swerwego, gomme go bile le seloba se se diretšwego sebe sela. Gomme lebakana, go fihla Peu ya mosadi e be e swanetše go tlapiriganya hlogo ya sephente ye e bego e tla lefa kotlo ya go tlala ya sebe, go bile kwana e dirilwe sehlabelo go fihla nako yeo go phethagatšwa. Gomme go bile le se sengwe seo se fihleletšwego, go bile se sengwe se dirilwego seo se bilego se segolo, tsela yeo motho a bego a ka phološwa gape.

47 Ke thabile kudu gore ba bile le khonferense. Ge nkabe ba se ba ba le khonferense, re ka be re bile kae bošegong bjo? Go bile se sengwe se dirilwego, ditumelelano di fihleletšwe, gomme melawana e dirilwe, gomme ba ile pele. Gomme khonferense yela ya mathomo e be e era phapano gare ga bophelo le lehu go moloko wa motho.

48 Gomme ka gona a re bitšeng khonferense ye nngwe. Go bile nako ge go bile le moprofeta yoo a tsebilego Morena Modimo bjalo ka Mophološi wa gagwe, gomme o ile a itshwara bohlaswa yenamong gomme a leka go e dira ka tsela ya gagwe mong.

49 A nka ema fa nakwana feela go bolela se, ngwanešu wa ka, goba kgaetšedi wa ka: Nako efe kapa efe yeo motho e ka ba ofe a ka tsogego a leka go dira Lentšu goba thato ya Modimo ka tsela ya bona beng, ba hloka khonferense le Modimo ka pelapela, gobane ba phošo. Go ne ditsela tše pedi feela go dira e ka ba eng, yeo ke nepagalo le phošo; ke tsela ya gago le tsela ya Modimo, tsela ya gago ka mehla e fošagetše.

50 Moshe o hweditše gore tsela ya gagwe ga se e šome. Gomme bjalo ka ge Moshe a ithutile ka tsela ye thata, kafao ke ithutile yona ka tsela yeo. Ga go pelaelo, eupša bontši bja batho fa

bošegong bjo, ba dutšego fa, goba ba emego fa ba ithutile yona ka tsela ya go swana, ke tsela ye thata. Go kaonekaone go neela thato ya gago go thato ya Modimo gomme o sware khonferense le Yena.

⁵¹ Gomme ge re hwetša gore Moshe ka go go tsena sekolo ga gagwe go gogolo le go ithuta ga gagwe ga bohlale, setswerere, bohlale. . . O be a le bohlale kudu go fihla a kgonne go ruta barutiši. Gomme e sego go leka go thekga go hloka tsebo, eupša ke nagana gore ge re fihla ka tsela yeo, re ka go legato la kotsi kudukudu re ka kgonago go tsena ka go lona, ge re eba setswerere kudu gore re tseba kudu go feta yo mongwe le yo mongwe gape. Seo ke seripa se e lego bothata ka lefase lehono. Seo ke se e lego bothata ka ditšhaba lehono, yo mongwe le yo mongwe o leka go ba setswerere kudu go feta yo mongwe.

⁵² Seo ke se e lego bothata ka batho lehono, re leka go phala se sengwe. Re a leka, ebile le ka dikerekeng tša rena, go bona ka fao re ka kgonago go aga ntlhohlo ye kgolo, legoro le lekaonana, bjalo ka ge re e bitša, go tsena, go apara bokaonana, go tloša mabje a bohlokwa a kgonthe le tše borala tša Ebangedi gomme ra itšimeletša godimo ga tšona, sebakeng sa aletara, go šišinya seatla, sebakeng sa kolobetšo ya Moya wo Mokgethwa, re itšimeletša go go šišinya seatla, goba kolobetšo ka go karabetša go go fafatša ga meetse tsoko, e ka ba eng go hwetša polane ya rena beng ka go yona. Eupša e ka se tsoge ya šoma, ga se ya tsoge ya šoma, gomme e ka se tsoge ya šoma. Tsela ya Modimo ka mehla e a rereša. E swanetše go ba tsela ya Gagwe, ke tsela e nnoši.

⁵³ Moshe ka go monagano ohle wa gagwe wo mogolo wa sešole, le ka fao a kgonnego go fihlelela, o naganne polao e bile po—po potšišo, goba, polao e bile tsela, gomme o bolaile Moegepeta. Gomme ona mathomo a gagwe, o ikhweditše yenamong a fentšwe.

⁵⁴ Nka no bolela se: Go na le badiredi ba bantši bošegong bjo ka nageng, le ka dinageng tše dingwe, le Bakriste ba bantši bošegong bjo, bao ka pelong ya bona ka kgonthe ba nyakago go hlankela Modimo, eupša ba ikhwetša bonabeng ba fentšwe, gobane ba tšea kgopolo ya bona beng ya bohlale ya Ebangedi: go no tšoenane kereke, goba go dira selo se sengwe se sebotse, goba go fa yo mongwe diaparotso, goba go dira tiro ye nnyane ye botse. Ge seo e le sohle se e tšerego, gona Khonferense ya Edene e bile ka lefeela, gomme lehu la Morena Jesu le bile ka lefeela. Modimo o beile lenaneo, gomme re swanetše go tla go lenaneo leo. Gomme ka pejana ge re fihla go leo, Kereke e tla fihlelela morero wa Modimo bokaonana, ge re fihla go lenaneo la Modimo.

⁵⁵ Moshe o lekile go e šoma ka tsela ya gagwe mong, gomme o hweditše gore o be a le phošo. Gomme ka go dira bjalo, bjalo ka ba bangwe ba bantši ba ba kgelogilego go tloga tsošetšong e tee go ya go ye nngwe, go ya godimo gomme ba leka go ekiša

Mokriste, goba go ema le go dira mohuta tsoko wa leswao, goba—goba pego tsoko ya thutotumelo yeo re e retago, re ikhwetša renabeng mo matsatšing a se makae, re fentšwe, gobane re leka go e dira ka go renabeng. E ka se tsoge ya šoma, re swanetše go kopana le lenaneo la Modimo, lentšu ka lentšu, leletere ka leletere.

⁵⁶ Le a bona, eng kapa eng o lekago go e dira, monagano wa bohlale o kgahlanong kudu le Moya. Monagano wa bohlale o nagana e swanetše go ba setswerere le bohlale, Moya wo Mokgethwa o kokobetše. Pšhatlaganya tšohle o kilego wa di tseba, sepela bose le go kokobela pele ga Morena, o Mo rata ka pelo ya gago yohle, ka monagano ohle wa gago, le ka maatla ohle a gago. Fao ke mo Moya wo Mokgethwa o šomago.

⁵⁷ Go go dira o dire dilo tšeo o sa naganago o ka tsoge wa di dira. O tla go dira o sokologe gomme o ye morago le go šikinya diatla, gomme o lokiše le batho, gore o kgone go tšoena kereke gomme wa no fela o ipitša Mokriste wenamong, gomme o hloya tlase ka pelong ya gago, eupša o ka se kgone go etwapele ke Moya wo Mokgethwa gomme wa dira seo, o ka se kgone go e dira. O ka se kgone—o ka se kgone go radia, o ka se kgone go aketša, o ka se kgone go goga dikwano tša go solega, e swanetše go ba ntle le godimo, tumelelo ya Moya wo Mokgethwa godimo ga yona.

⁵⁸ Moshe o lekile, eupša o šitilwe, Modimo o mmiditše. Gomme ga go pelaelo ka go kweng segalontšu sa ka, go ka no ba batho ba bantši bao Modimo a ba biditšego ka tsela ya go swana, eupša re lekile go okobatša yeo ka go tšoena kereke, goba go dira se sengwe sa bodumedi. Go ka se tsoge gwa kgotsofatša, o hloka khonferense le Modimo.

⁵⁹ Kafao Moshe, Modimo o ikemišeditše, gobane O mo kgethile go dira bjalo, o seselletše ka leganateng, gomme letšatši le lengwe ka lehlakoreng la morago la leganata Modimo o tšere sephetho go bitša moprofeeta wa Gagwe yo a bego a tšhaba. Gomme O hlaotše mohlare wo o itšego. Ka mehla ke maketše, “Ke a makala se A se beilego godimo ga mohlare wola gore ga se o swe.” Matlakala a be a dira modumo le go palega, gomme mollo o tuka, gomme ga ke tsebe o tukile botelele bjo bokae, eupša ga se wa swa, e be e le lefelo le le hlaotšwego ke Modimo go kopana le moprofeeta wa Gagwe.

⁶⁰ Modimo o kgetha lefelo go ba le dikhonferense tša Gagwe. Feel a bjalo ka ge dikgoši le babuši ba setšhaba ba hlaola mafelo a bona bakeng sa dikhonferense, Modimo o hlaola lefelo la Gagwe. Thapelo ya ka ya go botega gore setulo sa gago bošegong bjo, goba lefelo la gago la go ema, ke lefelo la Modimo le le hlaotšwego bakeng sa gago, gore A kgone go bolela le wena, go bolela le wena, go dira se sengwe, goba go bolela se sengwe seo se tla gogago šedi ya gago, gore A kgone go swara šedi ya gago feela dinakwana di se kae.

61 Moshe o sepeletše godimo go sethokgwa se se tukago, a šeditše le go lebelela a ke pono ye bjang e bilego go bona sethokgwa se se bego se tuka, gomme efela, se be se sa swe. Gomme ge a sepeletše godimo go sethokgwa se se tukago, o hweditše ditaello, “Rola dieta tša gago, Moshe, gobane lebala le o emego go lona ke lefelo le lekgethwa.” Moshe o obametše ka go rola dieta tša gagwe.

62 Re lemoga selo se tee, gore ge banna ba ne dikhonferense tša ditšhaba, ba tla mmogo, gomme ba hwetša lefelo le legolo, gomme ba—ba a keteka, gomme ba na le matena a magolo, gomme ba dula tafoleng, gomme ba ba le dino tša leago, gomme ba—gomme ba a itokiša, gomme—gomme ba ya ntle go tloga fale go leka go phethagatša se ba se hlaotšego ka menaganong ya bona go se dira.

63 Go fapana bjang go tloga go dikhonferense tša Modimo! Motho ga a tle mmogo ka dikhonferenseng tša Modimo go ja, ba tla mmogo go ikona, le go rapela, le go amogela ditaello, le go ya pele ka yona.

64 Moshe, a etla ntlhoreng ya thaba matšatši a masomenne a, gomme o bile godimo kua a hwetša melao, goba ka morago ga fao, o tsebile se e bego e le sona go kopana le Modimo, o tsebile se e bego e le sona go ba le khonferense le Modimo, kafao o letile matšatši a gagwe a masomenne, go bile bonolo morago ga ge a kile a ba le khonferense le Modimo.

65 Banna ba ba kilego ba ba le khonferense le Modimo, goba basadi, ba tseba se go se rago go tlogela dijo nako ye nngwe, go tlogela meetse, go tlogela dilo tša lefase, go tlogela se sengwe le se sengwe gape, go tla thoko le Modimo go swara khonferense.

66 Moshe go khonferense ye ya mathomo, sethokgwa se se tukago, o amogetše ditaello go tšwa go Modimo: “Ke nna Modimo wa botataweno, gomme Ke kwele dillo tša batho ba Ka, gomme Ke go roma tlase go ba lokolla. Ke nyaka o ye tlase ka Egepetā.”

Lebelelang ke mabaka a bonolo afe a a šomišitšego, Moshe a thoma go dira maitshwarelelo gomme a re, “Nna ga—nna ga ke. . . Nna ke a nokologa ka polelo,” le go ya pele.

67 Kafao O mmoditše gore O be a tla ba le yena, gomme Morongwa wa Modimo o be a tla ya pele ga gagwe, le maswao le matete ao a bego a tla a dira. Kafao, o be a le komana nako yeo go ya.

68 Ka morago ga ge o obametše Modimo, gomme o ile go thomo ye A go rometšego go yona, dinako tše dingwe re tla ka go maemo a mathata, Moshe o bethile seo. O ile tlase ka Egepetā gomme o dirile feela tla se Modimo a mmoditšego go se dira, o obametše Lentšu go fihla tlhakeng, gomme o be a latela Lentšu.

69 Modimo o tshepišitše Abraham gore Peu ya gagwe e be e tla diilela ka nageng ye šele magareng ga batho ba šele, eupša O be

a tla ba tliša morago go naga yela morago ga ge ba bile bothopša mengwaga ye makgolonne. Kafao Moshe o be a le mothalong ka go phethagala le Lentšu la Modimo, gomme ebile le ka go seo o sa thula dišitiši.

⁷⁰ Go ka no ba ba bangwe mo bošegong bjo ba dutšego godimo kgahlanong le seo, ba re, “Ke a babja, Ngwanešu Branham, ke bile Mokriste bophelo bjohle bja ka, ke bile le Moya wo Mokgethwa lebaka la mengwaga, ke bile moleloko wa kereke ye lebaka la mengwaga ye *mentsi kudu*, ke—ke phetše go botega, tšohle tše ke di dirilego gomme ke nna yo bošegong bjo, ngaka o bolela gore ke swanetše go hwa, ke na le kankere. Ke na le bothata bja pelo. Ke ka go setulo sa bagolofadi,” goba se sengwe gape. Dilo tšeo di a direga.

⁷¹ Moshe o be a le ka mothalong wa mošomo wa Modimo ka go phethagala, gomme gape le ka mothalong wa Lengwalo. Selo sa pele go motho go se dira go hwetša ge eba se sengwe se fošagetše, ke go ithodišiša yenamong. A, sa pele, o ka mothalong wa Lentšu la Modimo? Gona selo sa go latela, a o ka mothalong wa mošomo, go latela se Moya wo Mokgethwa o go boditšego go se dira? Gona ge go le bjalo, gona go ne selo se tee feela se šetšego, seo ke khonferense.

⁷² Moshe o etilepele bana ba Israele ka seatla sa Modimo go tšwa Egepeta, gomme ba tlile Lewatleng le Lehubedu. Re tla bitša ye Khonferense ya Lewatleng le Lehubedu. O be a le tlwa ka mothalong wa mošomo, a etilepele bana go tshela Lewatle le Lehubedu, gomme o be a ba tšeela go ya nageng ya tshepišo bjalo ka ge Modimo a tshepišitše. O be a kwele go tšwa go Modimo, Moya wo Mokgethwa o be o le godimo ga gagwe, o ba etilepele go tšwa, o dirile mehlolo le maswao a Modimo, gomme fa ba be ba le thwi mothalong wa mošomo, gomme fale sešitiši se sengwe le se sengwe seo se bego se kgona go ba tswalelela. Go bonagetše o ka re ebile tlhago ka boyona e be e tla goelela, “Oo, Moshe le Israele, ke le kwela bohloko, gobane tshenyego e nno le letela.” Go ka no ba seo go wena bošegong bjo, tshenyego feela pele.

⁷³ Moshe o dirile eng, moprofeta yo mogolo yo, wa go tšhaba? O be a bile le khonferense e tee le Modimo, gomme o tsebile se go bego go se ra go yena, o tsebile selo se nnoši go dira e bile go ba le khonferense ye nngwe. O mo hlaoletše lefelo. Mohlomongwe re tla re, oo, ga ke tsebe, mohlomongwe godimo ka morago ga leswika le le itšego le, o ile godimo kua gomme mohlomongwe o khunamile ka matolo a gagwe, gomme a re, “Jehofa yo Mogolo, ke badile ka Mangwalong, goba, ka Lentšu le ke nago le lona, gore O lokolla batho ba Gago. O rometše Morongwa gomme o boletše le nna. Gomme ka maatla ke ka mothalong wa mošomo ka go gagamala, gomme ke rena ba mo Lewatleng le Lehubedu, gomme ga go tsela ya go ya mošola, kafao ke naganne ka go nnamong go ne selo se tee feela go dira: nka se tsoge ka leka go ithekga godimo ga bohlale bja ka, ke tla no tla go ba le khonferense le Wena.”

74 Modimo o rile, “Ema ka maoto a gago, Moshe. Sepela, bolela le bana ba Israele gore ba ye pele.”

75 Modimo ga a tsoge a re gomela morago, ga go go gomela morago ka go Modimo. Modimo ke, “Eya pele.”

76 Ga go kgathale ke legato lefe la ntwa o lego ka go lona, ge o katakatetše morago gomme wa re, “Ke boifa phodišo Kgethwa. Ke boifa *se, sela, goba se sengwe*. Ke boifa ka kolobetšo ya Moya wo Mokgethwa,” bolela gomme o ye pele. Ga go go gomela morago, o se ke wa tla morago, ga go selo go katakatela morago godimo go sona. Modimo ka mehla ke, “Eya pele.” Ge e le mothalo wa mošomo, mothalo wa Lentšu la Gagwe, eya pele, sepelela pele.

77 “Gabotse,” o re, “ke a tseba yo mongwe o ile ka bohlangeng.” Eupša yoo e be e se wena. O a bona? Mošomo wa gago ke go ya pele, go fihla Modimo a fetša ka wena, e no tšwelapele o eya pele.

78 Mengwaga e se mekae ya go feta ge Morena a mpeditše, nna modiša wa selegae wa Baptist, go ya go rera phodišo Kgethwa, ga se ka ke ka tsoge ka kwa selo se sebjalo bjalo ka Pentecost, go no swana le ge nka be ke se ka kwa yo mongwe a re, “Ke sehlopha sa bapshikologibakgethwa,” goba se sengwe. Eupša ge A tlile, gomme ke Mmone, gomme O boletše, ge Modimo a bolela, go na le se sengwe se swanetše go arabela go Lona, felotsoko. Ge eba kereke ya ka e le dumetše goba aowa, go ne yo mongwe o ya go le kwa.

79 Go tloga fao go tlile Oral Roberts le, le Tommy Osborn, le go ya pele, gomme mello ya tsošetšo e tuka gohlegohle lefaseng bošegong bjo. Gobaneng? Bolela, gomme o ye pele. O se ke wa katakata, re tla go mohuta wa go nokologa. Ga go lefelo la go nokologa. Ge go na le e ka ba eng, tsenang ka kereng ya go menagana gabedi, a re yeng pele. Ga go lefelo la go ema, Pentecost e ka se kgone go ema, ga go lefelo la go ema. A re se gotšeng mollo lefelong la go swana. La yo mongwe. . . Mello ye mebedi mo mašegong a mabedi. A re gotšeng mollo wo moswa fa bošegong bjo, le mollo wo moswa godimo tseleng, pele le pele, go fihla re bona Jesu. Ga go lefelo la go ema bjale.

80 Moshe, o rapetše gomme o hweditše ditaello, gomme o gatetše ntle gomme o kgopetše bana ba Israele go ya pele, gomme lewatle le bulegile, gomme ba ile go kgabola. Modimo ka mehla o dira tsela.

81 Khonferense, seo ke se dikereke di se hlokago bošegong bjo ke khonferense, go hwetša ditaello, le go sepelela pele. Rapelang gomme le botšišeng ge eba ke nako bjale go bea tšhegofatšo ye kgolo ya se, yeo e kgabotšego mo mengwageng ye masometharo goba masomenne ya go feta ya Pentecost, ya tšhegofatšo ya Moya wo Mokgethwa. Kolobetšo yeo e goteditšego lefase ka mollo bakeng sa tsošetšo ye e sego ya ke ya bewa, ya bonwa ge e sa le go tloga letšatši la Pentecost mathomong.

⁸² Ga se ba ke ba ba le yona ka tsošeletšong ya Lutheran, ga se ba ke ba ba le yona ka tsošeletšong ya Wesley, ga se ba ke ba ba le yona ka tsošeletšong ye nngwe go fihla tsošeletšo ye. Ga se nako go Pentecost go—go ipea ka boyona go peu, ke nako ya go phurulla ditente tša yona. Ke nako ya go ya pele, go tliša baena ka gare go tšwa go kerekeleina ye nngwe le ye nngwe, go tšwa go mosepelo wo mongwe le wo mongwe wa bophelo, le Molaetša go tshuma go ya pele, ga go nako ya go ema. Ge le ema, a re bitšeng khonferense, re bone se e lego phošo.

⁸³ Ge re fihla lefelong go fihla re nagana ke rena re nnoši ba Modimo a ka kgonago go ba šomiša, bokaone re bitše khonferense. Modimo o rometše Jesu, Morwa wa Gagwe, go hwela moleloko yo mongwe le yo mongwe wa Mmele wa Kriste. Momethodist, Mobaptist, Mopresbyterian, Molutheran, Mokatoliki, e ka ba eng ba ka bago, bohle ke bana ba Modimo ba tshepišo. Ba ya go kwa bjang Molaetša ntle le ge rena . . . ?

⁸⁴ Ge re fola, re ya go dira eng? Gona re bea mohlala wo mobe pele ga bona. Ga se nako ya go fola, ke nako ya go ruthela. Gomme re ka se kgone go ba le go ruthela, go fihla re na le khonferense, tsošeletšo ya nako ya kgale ye e tla tlišago morago mello ya tsošeletšo ye e tla gogago šedi, ge badiradibe ba tswalelwa ka Mmušong wa Modimo, ge motho a thoma go bona basadi ba tumo ye mpe, le banna ba tumo ye mpe, le badiradibe ba sokologa, gomme ba fetola bophelo bja bona, ba eya pele, ba dira dipušetšo, ba lla, ba tliša dišerefe tše bohlokwa. Ke—ke kereke e hloka taba ye botse ya lerato la bomodimo la nako ya kgale, lerato la boena. Re hloka khonferense, go swara khonferense.

⁸⁵ Ka pela, a re yeng go khonferense ye nngwe. Go bile le Khonferense ya Getsemane. Go ne tše ntši re ka kgonago go di bolela. Go bile le khonferense letšatši le lengwe ka Babilonia, ge eba ba be ba swanetše go khunamela seswantšho sa kgoši goba ge eba ba boloka Lentšu la Modimo. Modimo o rometše Motho wa bone tlase ka lebaka la khonferense yela.

⁸⁶ Daniele o ile a swanela go ba le khonferense, gomme Modimo o rometše Morongwa, mohlomongwe Pilara ya Mollo, Seetša, se tšhošitše diphoofole tšela, gomme ga se di be le maatla godimo ga Daniele, gobane o be a swere khonferense, kopano ya thapelo felotsoko. Seo ke se se dirago phapano.

⁸⁷ Ge re phuthelwa kudu ka go dilo tša lefase, go fihla re sa kgone go tla kerekeng ka Lamorena bošego, goba—goba Mošupologo bošego, goba bošego e ka ba bofe bjo bongwe, gomme re swanetše go šetša mananeo a rena a thelebišene, le selo se se itšego boka seo, seo se laetša gore lefase le dutletše ka go rena.

⁸⁸ Se kereke ya Pentecostal, le dikereke tše dingwe tšohle di se hlokago, bošegong bjo ke go beela thoko boima bjo bongwe

le bjo bongwe, le sebe seo se re nyamišago gabonolo, gore re ke re kitime ka kgotlelelo lebelo leo le beilwego pele ga rena. Re hloka khonferense, kopano ya thapelo tšekelele bakeng sa kereke ya Modimo yo a phelago go bitšwa mmogo. Le se nagane ke befetšwe, goba go fefeana nnamong, ke tseba se ke bolelago ka sona. Tlhoko ya kereke bošegong bjo ke khonferense, kopano ya thapelo, go tla mmogo, go bitša mmogo.

⁸⁹ Badiredi, ba thube leboto la bona la gare la karogano. Maloko a kereke ao a tla lebalago diphapano gare ga dikerekemaina tša dikereke, maloko a kereke, le badiredi, ba swarelela go dinaka tša aletara ka mmero o tee gomme ba rapela go fihla Mollo wa Modimo o thoma go wa gape, Modimo o tseba ma... ma manganga, le phapano ya batho e robilwe, gomme poifo ya bomodimo, le lerato la boena le tšea lefelo la lona ka pelong ya motho, gona o tla ba letswai, gona Molaetša o tla ba le lefelo la Wona la pele ka pelong, O tla ba le khuetšo ya Wona ka toroponggolo.

⁹⁰ Re ka goeletša, gomme ra goeleta, le go dira e ka ba eng re nyakago, gomme go ka se tsoge gwa huetša motho go fihla ba bona bophelo bja Kriste bo tšweletšwa ka go wena, yo mongwe yo a lego boleta, le kgaogelo, le go lebalela, le go ba komana go retolla lehlakore le lengwe la lerama, goba go fa jase ya bobedi, goba go ya maele wa bobedi. Bokriste mo tiragalong, e sego go no rutwa go tšwa phuluphithing, eupša bo dirwa magareng ga maloko, magareng ga badiša, ke ge o bona Kriste a phela ka kerekeng, diphetho di dirwa.

⁹¹ Jesu o tlišitšwe, Yenamong, go sephetho. Gomme pele a eya Khalibari, Tate o tlišitše Morwa wa Gagwe Mong ka khonferenseng ka Getsemane, ge Barongwa ba tšere maemo a bona go bona se sephetho se bego se tla ba.

⁹² Oo, go ka no be go se gwa ba ka tsela ye, eupša a re naganeng mohlomongwe go bile: ke kgona go Mo kwa a re, “Morwa, a O hlogela go ya pele Khalibari? Go na le sehlopha se se Go letetšego, go na le tlhomaro, go na le lehu le polao di robetše ka tseleng, go na le tshenolo ya mmele wa Gago Mong, ba tla Go hlobola diaparo, ba tla Go betha ka go fihla o eba sesohlo, ba tla hlalaiša mphaphahlogo wa meetlwa godimo ga hlogo ya gago, gomme O tla hwa o goeletša bakeng sa kgaogelo. A O swanetše go ya pele?” Lebelelang sephetho.

⁹³ Gomme dinako tše dingwe ge re dutše ka ditulong tša rena gomme Moya wo Mokgethwa o re, “O swanetše go dira *se*, goba o swanetše go dira *sela*...” O na le yo mongwe o ka se bolelego le yena, o ka se bolele le bona, o ka se e lokiše, gomme o no ba le dihlong go ya godimo gomme wa re, ge o le phošong, goba eng, ge o se ka phošong, go ya godimo gomme wa re, “Ngwanešu, a re e lebale gomme re bolele go e fetša.”

⁹⁴ Jesu, ge A lebeletše godimo ka sefahlegong sa Tate, O rile, “Ga se thato ya Ka, ke ya Gago go dirwa.” A sephetho! Sephetho sela se kgwapareditše gomme sa swiela lefase, se sa tla bošegong bjo go soulo ye nngwe le ye nngwe ye e itsholago. “E sego thato ya Ka, eupša ya Gago e dirwe.” Seo ke sephetho sa . . .

⁹⁵ Go bile sephetho gape se dirilwego, sephetho sa Pentecostal. Lekgolo le masomepedi ba ile kamoreng ya ka godingwana, gomme ba be ba letile ka baka la gore Moetapele wa bona—wa bona, Morena wa bona o be a rotogetše godimo ka Magodimong go Tate, gomme O be a ba boditše, O rile, “Bjale, letang godimo toropongkgolo ya Jerusalem. Gomme ga Ke nyake le ye ntle le rere gabjale, Nna ga ke nyake le be le sekolo e ka ba sefe, ga le hloke thutamodimo e ka ba efe gape. Eupša Ke nyaka le ye godimo kua gomme le no leta kua go fihla le tsena ka go mmero o tee, gona Nka kgona go romela sephetho sa Legodimo morago go lena.”

⁹⁶ Seo ke se e lego bothata lehono, seo ke se e lego bothata ka dikereke tša rena lehono. Sephetho sa iri ye ke eng? Lebelelang fa, ge Khrushchev, gomme ge makomonisi letšatši le lengwe a ka tšea lebotlelo le lennyane la sehlare gomme ba le šišinya ka sefahlegong sa lefase, seganamodimo, sehlokamodimo, setšhaba sa go hloya Modimo, gomme sa re, “Re ka kgona go tšea segole gomme ra tšhela se ka go yena, gomme o tla otlologa gape.”

⁹⁷ A kgobogo! Le ge ke leboga e ka ba eng yeo e ka dirwago go thuša balwetši, ga ke nyenyefatše seo, eupša khunologo ga se ya fiwa baganamodimo, e filwe go bodiredi bja Morena Modimo. Kereke ya Modimo yo a phelago e na le khunologo le bona, ga e tšwe lebotlelong, e tšwa Khalibari. Eupša bothata ke eng? Go ne se sengwe sa phošo. Re hloka khonferense, Kereke e hloka go tla mmogo, batho ba hloka go tla mmogo, gomme ba leta ka mmero o tee go fihla sephetho se etla.

⁹⁸ Ba leka go aga dišireletšapomo tlase ka tlase ga mobu dikgato tše makgolonne, gomme ba se dira ka tshipi. Gobaneng, go kgehlemanya ga ye nngwe ya dipomo tšela tšeo di thuthupišago molete ka mobung botebo bja dikgato tše lekgolo le masomešupa tlhano, bakeng sa disekwere maele tše lekgolo masometlhano! Gobaneng, ga go tsela ya go epa go tšwa go yona, go ne tsela e tee feela go tšwa go yona, ke go ya godimo ka ntle ga yona. Dikhonferense. Re swanetše go ya go teba bjang, khonkhoriti e matlafaditšwe gakaakang le dilo tše dingwe, tšeo di ka se—tšeo di ka se swanele *yeo*.

⁹⁹ Re mo go tlang ga Morena, Kereke e hloka go bitšwa mmogo ka khonferenseng. Etlang, mmero o tee, letang go bona se sephetho sa Modimo se lego. “O Morena, re swanetše re dire eng?” Re tlile fase bjale, re rerile Ebangedi, re boletše ka maleme, re bile le ditlhathollo, re bile le maswao, le matete, le mehlolo ka kerekeng ya rena, eupša re tlile lefelong go fihla re eme.

100 Bjale le—le lekomonisi le šišinya lebotlelo pele ga rena, la re, “Re na le sona *fa*.”

101 Jesu Yenamong o rile, “Ruri, Ke re go lena, ge o ka re go thaba ye, ‘Šuthišwa,’ gomme wa se belaele pelong ya gago, eupša wa dumela gore se o se boletšego se tla direga, o ka ba le se o se boletšego.”

102 Oo, nna! Bothata ke eng gona? Khonferense, seo ke se re se hlokago, khonferense, mmero o tee, le khonferense.

103 Ba letile, ba nyakile go bona ka fao Kereke e swanetšego go sepedišwa. Ba nyakile go bona ge eba E swanetše go sepedišwa ke dikgopolo tša bohlae tša go phela gabotse ga maitshwaro, ge eba ba swanetše go E sepedišwa godimo ga motheo wa—wa mefafašo ye e itšego, goba dibopego tša dikolobetšo, goba ba swanetše go dira eng? Kereke ye mpsha ya Bokriste e swanetše go sepedišwa bjang? Gomme go bile khonferense ye e swerwego ka Legodimong: Ba swanetše go dira bjang? Ba rwala puku ya pampiri le bona gomme ba ngwale leina la yo mongwe le yo mongwe, ba ba fe selalelo, gomme ba ba romela pele, a e be e le yona?

104 Eupša ba be ba letile ka mmero o tee lefelong le tee, bao e be e le Bafarisei, Basadutsei, bohle ka moka ga bona. Dilo tše dinnyane tša dikerekemaina tša bona di be di robegile, sekgao sa bona, le go ya pele, sa dithuto tša bona—tša bona tša bodumedi di be di robilwe, ba be ba tla . . . ba bileditšwe go khonferense ke Jesu Kriste.

Kua ba be ba letile ka mmero o tee . . .

Gomme ka pelapela go tlile modumo go tšwa legodimong boka phefo ye maatla e tšutlago, gomme e tladitše ntlo yohle moo ba bego ba dutše.

. . . fale go tšweletše go bona maleme a maphakga boka . . . mollo . . .

Gomme bohle ba ile ba tlatšwa ka Moya wo Mokgethwa, gomme ba thoma go bolela ka maleme a mangwe, bjalo ka ge Moya o ba file polelo.

. . . go be go le . . . Bajuda, banna ba ba ineetšego, go tšwa setšhabeng se sengwe le se sengwe ka tlase ga legodimo ba be ba kgobokane kua Jerusalema.

. . . ge se sohle se kwaditše lešata kgole, ba tlile mmogo, . . . ba be ba gakanegile, gobane ba kwele motho yo mongwe le yo mongwe a bolela ka leleme la gabo mong leo a tswetšwego ka go lona.

105 Seo e be e le sephetho sa Modimo sa ka fao Kereke e swanetšego go sepedišwa.

106 Ngwanešu, re tšea monyetla godimo ga dilo tša Modimo, gomme re e dira feela sehlopha sa rena ke sona se nnoši seo se

nago le yona, ke nako go bitša khonferense ye nngwe. Boelang morago go Modimo gape gomme le kwe modumo wo mongwe boka phefo ye maatla e tšutlago, go bona lerato la boena.

¹⁰⁷ Re kwa kudu lehono ka ga Bakriste ba swanetše go ba boradimilione, o swanetše go ba le molokoloko wa diCadillac goba ga o wa semoya. Seo se bokgole bjo bokae! Ke be ke bolela le sehlopha sa monna mo mašego a se makae a go feta, seo se phatlaladitšego tshedimošobofora go kgabaganya lefase, ka dipukung, le go ya pele, gore o swanetše. . . eba Mokriste gomme kgwebo ya gago e a atlega, le se sengwe le se sengwe. E lego seo se lokile, Modimo o tla dira seo, eupša se re se hlokago lehono ga se kgwebo ya go atlega, se re se hlokago lehono ke bopaki bja maatla a tsogo ya Jesu Kriste bjalo ka hlatse ye e phelago.

¹⁰⁸ Seo se kgahlanong gakaakang le Pentecost ya kgonthe! O swanetše go phela ka boagišaneng bjo bokaone lehono, o swanetše go dira *se*, o swanetše go apara ka tsela *ye*, goba go ba ka tsela *yela*, seo se lokile, ke dumela Bokriste, bjalo ka sešepi le meetse a mantši bjalo ka ge re na le wona, a tla go dira o phele o hlwekile wenamong, yeo ke nnete, nameng, gomme, ka nnete, ge Moya wo Mokgethwa o le fao O tla dira semoyeng. Eupša ngwanešu, seo go le bjalo ga se se ke bolelago ka sona. Se ba se dirilego ka letšatšing lela, sebakeng sa go leka go ikgantšha ka ga ke bontši gakaakang bja dilo tša lefase ba bilego le tšona, ba rekišitše se sengwe le se sengwe ba bilego le sona gomme ba se abagantše magareng ga bahloki.

¹⁰⁹ Moisa tsoko o emeletše ge ke boletše se, o rile, “Ngwanešu Branham, yeo e bile phošo ye kgolokgolo Kereke e kilego ya e dira, go ba dumelela go dira seo.”

Ke rile, “Gobaneng o hwetša seo?”

O rile, “Gobane ge tlhomaro e tsogile, ga se ba be le magae go ya go ona, gomme ba be ba phatlaletše mogohle.”

¹¹⁰ Ke rile, “E be e le thato ya Modimo tlwa, gobane nako yeo ba be ba se ne lefelo go ya, ba se ne dithoto tša lefase, ba ile pele ba rera mogohle, gomme Lentšu la Morena le godile.” Diphetho tša Modimo ka mehla di a rereša. Yeo ke nnete. Ba ile pele mogohle ba rera, ke tsela yeo A bilego le yona go phatlalatša Lentšu.

¹¹¹ Khonferense ya Pentecostal e be e se ya swanela go ba godimo ga sehlopha se se itšego se, goba sekgao se se itšego, eupša, “mang kapa mang a ratago, a a tle.” Seo ke se Petro a se boletšego, “Ka gore tshepišo ke ya lena, le go bana ba lena, le go bona ba ba lego kgolê, le ba bantši ba Morena Modimo wa rena a tlogo go ba bitša.” Fao ke mo e lego ya gona, ya “mang kapa mang a ratago, a a tle, a ka nwa go tšwa methopong ya meetse a Morena.”

¹¹² Bjale, go bile le khonferense ye nngwe, gomme re tla go tswaleleng, ka khonferense ye ya mafelelo, go bile le khonferense e tsogilego ka morago ga ge ba phatlaletše gohlele ba rera. Gomme ba babedi ba bona ba ile godimo kgorong ye e bitšwago

ye Botse, gomme fale go be go robetše monna wa segole yo a bego a babja, a golofetše go tloga popelong ya mmagwe, gomme o be a golofetše maotong a gagwe. Gomme Petro le Johane ba rile, “Re lebelele.” Gomme o dirile, gomme o rile, “Silibere le gauta ga ke natšo,” seo e sa le . . . “eupša se ke nago le sona . . .”

113 A o ka rekiša seo bakeng sa silibere le gauta? A o ka rekiša seo bakeng sa leina la botsebalegi? A o ka rekiša seo bakeng sa pontšho ya thelebišene ka Lamorena bošego, goba Mošupologo bošego, Labobedi bošego, e ka ba neng go bilego, ge kereke ya gago e ne ditirelo di kгатlampana? Seo ke se e lego bothata lehono. Ka mehla ke boletše se: “Ge *Se* e se *Sela*, gona ke tla boloka *Se* go fihla *Sela* se etla.”

114 Petro o rile, “Ke na le silibere goba gauta, eupša se ke nago le sona, ke tla go fa: Leineng la Jesu Kriste wa Nasaretha, emelela gomme o sepele.” Gomme monna o ile a dikadika gannyane, gomme Petro a mo swara ka matsogo, yena le Johane, gomme ba mo phagamišetša godimo, gomme marapo a dikokoilane tša gagwe a amogetše maatla, a thoma go taboga le go tumiša Modimo.

115 E dirile se sengwe go phuthego. Ba ba tšeetše ka gare, gomme ba ba hwiphinya, gomme ba ba tšhošetša, gore ba se sa rera Leineng le le bjalo, ga go sa ne go šwalalanya bohanya bjola bja Pentecost bokgole e ka ba bofe.

116 Kafao ge ba dirile seo, ba ile ntle ka tšhošetšo yela, gore ba be ba tla lahlelwa ka kgolegong ge ba le rerile gape, ba boletše e ka ba eng ka, Jesu a tsošitšwe, le Moya wo Mokgethwa fa, o dira mehlolo. Le tseba se ba se dirilego? Ba be ba le bothateng, go be go le tšhoganetšo, kafao ba ile go sehlopha sa bona beng.

117 Fao ke mo re swanetšego go ya bošegong bjo, e sego go ya ntle le go botšiša meyara wa toropokgolo ka fao re swanetšego go dira *se*, goba ka fao re swanetšego go dira *sela*. Ga ra swanela go romela kgole go sekolo tsoko sa thuto, gomme ra botšiša ka fao re swanetšego go dira *se*, goba ka fao re swanetšego go dira *sela*. Ge kereke ya rena e ota Moyeng, selo se re swanetšego go se dira ke go swara khonferense le Modimo.

118 Ditiro 4 ba swere khonferense, gomme ba rerile, gomme ba rapela ka moggwa wo: “Morena, gobaneng bahetene ba befetšwe gomme batho ba eleletša selo sa lefeela? A go re loketše go gana go rera phodišo Kgethwa ka melaetšeng ya rena? A re swanetše go rera phodišo Kgethwa, goba a re swanetše go tlogela selo se sebjalo? O Morena, re tseba se Lentšu la Gago le se bolelago, gona re fe sebete, tlhohleletšo.” Oo, ngwanešu! Ka gona ntlo ya šišinyega fao ba bego ba kgobokane mmogo. A karabo!

119 Re fe khonferense boka yela ka Eleventh le Garfield, re tla rera Lentšu la go tlala la Modimo, re tla ema go se sengwe le se sengwe seo Modimo a rilego emang. Re tla dumela go go hweng go tšwa sebeng le go phela ka go Kriste. Re dumela gore mo—

mo motho yo a hwilego sebeng, o gana dilo tša lefase, gobane di hwile go yena. Ga go sa ne masebo, le metswirinyo, le go baka, le dintwa, le dikgogakgogano, o khutšong le Modimo le Kereke go tloga nako yeo go fihla letšatši le a tlošwago lefaseng.

¹²⁰ Ke a dumela gore Moya wo Mokgethwa o bolaya tlhago ya lefase ka go monna goba mosadi. Ee, mohlomphegi. Ke a dumela gore phodišo Kgethwa e lokile. Ke a dumela gore maatla a Moya wo Mokgethwa a no ba a magolo lehono bjalo ka ge a bile ge go bile ge a tšholotšwe ka Pentecost. Ke a dumela a phušula maboto a karogano gomme a tliša lerato la boena, gore diabololo le matshwenyego ohle a lefase a ka se kgone go re aroganya le lerato la Modimo leo le lego ka go Kriste. Re hloka khonferense, khonferense ya kgonthe go re tliša mmogo ka go mohuta wo . . .

¹²¹ Go na le khonferense ye nngwe e a tla, gomme yeo ke khonferense ya Kahlolo. O ka no ba o be o se ka go Bagolo ba Bane, ebile ke be ke se gona, o ka no be o be o se ka Geneva, ebile ke be ke se gona, eupša, ngwanešu, kgaetšedi, a nke ke bolele se go wena bjalo ka ngwaneno, yela, o ya go ba kua.

¹²² Nako le nako ge ambulense yela e goelela ntle fale mo mokgotheng, e go dira o tsebe gore o ya go ba kua, le wena; nako le nako ge o feta kgauswi le serapa sa mabitla gomme o bona leswika la lebitla, sengwe se a go botša o ya khonferenseng yela; nako le nako ge o ekwa segalontšu sa tšhebotšo sa modiša wa gago go kgabaganya phuluphithi ye, se go botša o ya Kahlolong; nako le nako ge o kama moriri wa gago le go bona bopududu goba o ewa, mašošo sefahlegong sa gago, mahlo a gago a fifala, ke eng? O ya Kahlolong. O ya go ba khonferenseng yela, e no elelwa seo. O swanetše go ba kua, yo moswa goba wa go tšofala, wa go loka goba wa go fošagala, o ya go ema kua. “Dibe tša banna ba bangwe di ya pele ga bona, tše dingwe di a latela.”

¹²³ Khonferense ye re e hlokago bošegong bjo ka Amerika, go swana le mo ka Phoenix, le go kgabaganya lefase mogohle, ke khonferense ya kopano ya thapelo ya fešene ya kgale, ya lefelo moo re ka boelago morago go lefelo moo lerato la boena le phelago, moo Moya wa Modimo o ka tlogo ka dipelong tša rena, gomme wa re dira go šokiša kudu bakeng sa dilo ntle fa tšeo di kгатlampanago ka lefaseng. A le a tseba Morongwa wa go swaya o rile, “Beang leswao godimo ga bao ba ba fegelwago le go lla bakeng sa makgapa a a dirwago ka toropongkgolo”? Ge nyakišišo ya kahlolo e kгатlampana, go bona ke mang a nago le maswanedi go phonyokga bogale, Morongwa o be a swanetše go swaya feela bao ba llilego le go fegelwa bakeng sa makgapa a dirilwego ka toropongkgolo.

¹²⁴ Bjale maraka Phoenix bošegong bjo, mo ke mo khonferense e swerwego. Re tlile mo bakeng sa morero woo, go swara khonferense mo ka—ka kerekeng ye—ye. Re tlile go fa mabaka magareng ga lena, Modimo o rile, “Etlang, a re faneng mabaka

mmogo.” Ga go kgathale se o—o se dirilego, a re—a re lebaleng seo gomme re thome gabotse bjale. [Ga go selo go theipi—Mor.] “Kahlolo e etla, bohle ba tla ba kua. Ke mang a latotšego, goba ke mang a gannego?” Ga go kgathale se o se dirilego, o ya go khonferense yela, Gomme o ya go swanela go tšwelela fale pele ga Kriste go fa lebaka la bophelo bja gago, ka fao o bo šomišitšego.

¹²⁵ Go ka no ba ba bangwe ba re, “Gabotse, lebelela fa, Ngwanešu Branham, ke nna mokgalabje, mokgekolo, ga—ga ke yo bohlokwa. Ke tswetšwe ka legaeng le le bego le sa dumele go Modimo.”

¹²⁶ Ga ke kgathale go ka ba go se be bohlokwa gakaakang, o ka ba yo monnyane bjang, o ka ba motšofe gakaakang, o ka no ba modiradibe gakaakang, o lekile makga a makae go amogela Moya wo Mokgethwa, ke makga a makae o lekilego go sokologa, ke makga a makae o lekilego go dira gabotse gomme wa šitwa, go sa ne dikholofelo go wena ge feela Modimo a kokota mojakong wa gago. Ga go kgathale ke dikereke tše kae o di tšoenego, ke diphošo tše kae, gomme ke bohlanga bjo bontši gakaakang, goba ke bontši gakaakang se wena, goba *sela* o se dirilego, go sa na le dikholofelo ge feela Modimo a kokota mojako. Khonferense.

¹²⁷ Ke a dumela bošegong bjo, gomme ke a rapela gore thwi ka go batheeletši ba, gonabjale, gore Barongwa ba Modimo ba tla tšea mafelo a bona go dikologa moago wo. A re swareng khonferense. Go ka reng ge o ka hwa bošegong bjo? Goba go ka reng ge yo mongwe a kitimela ka mojako, gomme a re, “John Doe, ke na le molaetša mo bakeng sa gago.”

“Oo, ke eng? Ke nna John Doe.”

“Ke na le taelo mo, o ba mojabohwa wa milione wa ditolara.” Oo, seo e tla ba se sebotse, eupša o ka no hwa pele o ka tsoge wa o hwetša.

O ka no re, “Ke tseba bjang ke na le ditolara tše milione?”

¹²⁸ “Gabotse, še—še taelo ya poso, še, go tšwa mmušong o bontšha pele ye e ka ngwalwa, taelo ye, go swanetše go ba ditolara tše milione go peeletšo pele ye e ka ngwalwa.”

Ke re, “Gabotse, o goeletša ka eng? O no ba le ntsekana ya pampiri.”

¹²⁹ Eupša o re, “Lebelela se e lego sona. Lebelela godimo mo, leina la klereke ya poso šele,” ge se sebjalo se ka ngwalwa, “ditolara tše milione go peeletšo fa, di ka pankeng.”

¹³⁰ Ga ke kgathale se o nago naso kgahlanong le wena, o ka no ba le kankere, o ka no ba—o ka no ba o babja ka sebe, o ka no ba le go swarwa ke matimone, ga ke kgathale se o nago naso, ke na le molaetša mo bakeng sa lena, ke goelesa go kgabaganya phuluphithi ye ka maatla ka fao nka kgonago: Go na le tshwarelo, go na le mogau, go na le phodišo, go na le tebalelo, go na le lerato, go na le thabo, go na le khutšo.

131 O re, “Gobaneng o thantshetšwe kudu ka yona, Ngwanešu Branham?”

132 Go ngwadilwe: “Wena dibe tša gago di bjalo ka bohubeu, di tla ba tše tšhweu wa leswele. Etla, a re fane mabaka mmogo.”

133 Eupša o re, “Ga ke ne maswanedi.”

134 Ke a tseba ga o nao, eupša Jesu o go hwetše.

135 Ka toropongkgolo ya rena ye botse, goba, toropokgolo kgauswi le rena, letšatši le lengwe go bile kotsi ye e diregilego, hopo ya kgale e be e kgabaganya mokgotha, o be a lebege o ka re diaparo tša gagwe di be di le mankeretla, kefa ya gagwe ya kgale e be e kgeretlane, gomme mošemane yo moswa le mosetsana, ba mahlalagading ba etla go theoga mokgotha, ba kgeana seng sa bona, gomme ba be ba sa ele hloko moisa wa go šokiša wa kgale, gomme ba mo thutše le go mo rathela moragorago godimo, gomme ba mo pšhatletše ka thoko ga moago ge pampara e mo gogela ka thoko. Ge mošemane a retologile go tloga go mosetsana go bona mokgalabje, o tepogetše ka mathoko gomme a no mo pšhatlaganya ka thoko ga moago.

136 Ba tšhoganetšo ba biditšwe, gomme ba mo tšeeetše godimo sepetlele, sepetlele sa toropokgolo. Gomme ba mo senkasenkile, gomme fale matsogo a gagwe a be a robegile, maoto a gagwe a be a robegile, gomme a gagwe. . . Ba naganne o be a idibetše, ebile o be a sa heme le gannyane. Kafao sehlopha sa dingaka, ba naganne ka ba bangwe ba bilego le bona, gomme ba rile, “Re swanetše go swara khonferense ye nnyane fa. Bjale, mokgalabje o nyakile go ba masomešupa, ga go pelaelo, ga re tsebe—tsebe ke yena mang. Go tla re tšea diiri ka morago ga diiri tša nako ya rena go kara, go bea marapo a gagwe morago gape, le go leka go mo otlolla, gomme moisa wa kgale ga a ne botelele kudu go phela, gomme re ne ba bangwe ba letile ntle fa, ke no se dumele go bohlokwa go e dira. A re nong go mmea morago, gomme go ka se be botelele kudu go fihla a tla be a ile, go le bjalo.”

137 Eupša mokgalabje o be a se a hwa bjalo ka ge ba naganne o be a hwile, o ile a iphethola ka boyena, a re, “Bakgomana, ke kwele lentšu le lengwe le le lengwe le le boletšego.” O rile, “Ke boleng bja se sengwe,” o rile, “ke bile le boleng bjo bontši kudu go fihla Modimo a file Morwa motswalwanoši wa Gagwe gore ke phološwe.” Gomme o rile, “Ke amogetše molaetša wola mengwaga tsoko ye masometlhano ya go feta, gomme ka go fa dithereke mo mokgotheng, ke sepela go tloga lefelong go ya lefelong ke leka go rera Ebangedi.” O rile, “Ke ne boleng bja se sengwe, goba Modimo a ka be a se a ke a mphološa.”

138 Nnete, o ne boleng. Barongwa ba Modimo ba fa. Ga ke kgathale se o se dirilego, “Le ge dibe tša gago di le tše khubedu, di tla ba tše tšhweu boka wulu; le ge e le tše khubedu bjalo ka madi, di tla ba tše tšhweu bjalo ka leswele.”

139 A re swareng khonferense, yo mongwe le yo mongwe moo o lego, gomme re botšiše Modimo, “O Morena, a ke ne boleng e ka ba bofe? Ke no ba mosadi yo monnyane wa lapa. Ke—ke no ba molemi. Ke—ke šoma setešeng sa petrole.”

140 “Ga ke kgathale se o se dirago.”

141 “Eupša, o a bona, Morena, ke—ke bile yo mobe, ke—ke dirile dipontšho tše tharo goba tše nne, gomme ka wa.”

142 “Ga ke kgathale se o se dirilego, a re sware khonferense.” Le ge meleko ya gago e šitilwe, le ge wena, mahlale a gago a fetile, Modimo o na le sethokgwa se se tukago thwi kgauswi le setulo se sengwe le se sengwe mo, bošegong bjo, O na le Morongwa yo a ka kgonago go gotetša pelo ya gago. “Etlang, a re faneng mabaka mmogo.” A re thomeng fa go tloga Eleventh le Garfield. A re thomeng, lena Bakriste, gomme a re swareng khonferense. A re swareng khonferense, “Morena, bophelo bja ka ka pela bo tla be bo fedile. Jesu o tla tla ka pela.”

143 Re ya go tla go melaetša yeo beke ye e tlogo, Morena ge a rata, go tla mola la bobedi, le ka fao go lego kgauswi.

144 Bjale, gomme, “Ke swanetše go dira eng? Mohlomongwe ke no ba le beke ye go šoma, gomme yeo e tla ba ya mafelelo yeo nka tsogego ka ba le nako go šoma.” A re swareng khonferense bjale gomme re bone se Moya wo Mokgethwa o tla se bolelago, ge re inamiša dihlogo tša rena mogohle, ka gare le ka ntle. Ge moralokapiano wa rena fale, e ka ba mang a lego, a ka ya go piano, feela nakwana.

145 Bjale, ge le sa rapela, a nke Moya wo Mokgethwa ka go bobotse le kgaogelo ya Gagwe, le boleta bja Gagwe, a theogela go wena, gomme a re, “Ngwana wa Ka, yoo ke Nna ke bolelago le wena. Ke—Ke—Ke nyaka go bolela le wena nakwana feela. Ke—Ke a tseba gore o ikwela o—o ahlotšwe, gomme Ke—Ke nyaka go go tšeela kgauswana gannyane go Nna.”

146 Ga o nyake go tla o se ne selo ka diatleng, ga o nyake go tla ka sebe godimo ga letswalo la gago, o nyaka go tla ka la gago . . . ka lethabo, le khutšo, le thabo ka dipelong tša lena.

147 Ge re sa ne dihlogo tša rena di inamišitšwe gomme mahlo a rena a tswaletšwe, yo mongwe le yo mongwe wa lena bjale, ye nnyane, khonferense ya sephiri le Modimo ge re sa letile. “Le ge dibe tša lena di le tše khubedu, efela di tla ba tše tšhweu boka leswele; le ge e le tše khubedu bjalo ka madi, di tla ba tše tšhweu bjalo ka wulu.”

148 Gabotse, o re, “Ngwanešu Branham, ke bolwetši bjo ke nago nabjo.”

149 Yeo ke . . . Tumelo ye nnyane gonabjale e tla no fediša selo ka moka. E no ba sebe se sennyane go se dumele. Sebe ke eng? Gosedumele. “Yo a sa dumelego o šetše a ahlotšwe.” A re hwetšeng khonferense ye nnyane.

150 Letšatši le lengwe ke robetše ke babja, ebile ga se ke kgone go hwenahwena lebaka la matšatši a senyane. Gomme ke kwele se sengwe ka kamoreng ya ka, ke lebeletše godimo, gomme fale go eme yo Mongwe a apere bošweu. Ke bone Beibele e bulega, gomme sefapano se tšwile go Yona, go tšwa sefapanong go tlile Jesu, gomme O mpoditše se ke bego ke lokišetša go ya ka go sona seo se bego se fošagetše. Oo, khonferense yela, bobose! Motsotswana o tee moragwana ke leleditše mogatšaka, gomme o be a tšhogile kudu o lahletše dikobo ka lebatong, dilakane, o be a etla go alola malao a ka. Feela polelo ye nnyane le Jesu e e dira go fapana.

151 Bjale, ka gare le ka ntle, ka dihlogo tša lena di inamišitšwe, ke ba bakae ba ka ratago go gopolwa bošegong bjo, ka go thapelo ya go tswalela molaetša? A o ka phagamiša seatla sa gago? Modimo a go šegofatše, wena. Modimo a be le wena. Ka ntle a o ka no nyaka go swara seatla sa gago? Modimo o a bona, ga go leswiswi le leso bjalo, eupša se A kgonago go se bona. Ee, lekgolo le masometlhano, makgolopedi, goba mohlomongwe bontši, diatla di ile godimo. Ga go tselo go rena go dira pitšo ya aletara mo, aletara e tletše ka bana ba bannyane. Eupša... [Ngwanešu o bolela le Ngwanešu Branham—Mor.]

152 E nong go tšwelapele le nagana. Bjale, go lena ba le babjago: A o ka phagamiša seatla sa gago, wa re, “Morena, a nke ke be... a nke ke e boledišane le Wena gonabjale?” Modimo a le šegofatše. Yeo ke nnete. Lekgolo le masometlhano goba bontši bja bao, goba mohlomongwe bontši bjo. Go lokile. E ka ba eng khonferense e lego, ga go kgathale: “Ge o dumela!”

153 Tate wa rena wa Legodimong, ka go bokgethwa le bobose bja motsotso wo woo o ka rago phapano gare ga lehu le bophelo go batho ba bantši, ga re kgone go bona ka ntle ba ba emego ka jarateng ya kereke, eupša go dikologa moago, ka gare, godimo ga batheeletši, re bone diatla tše ntši, bontši bja bao ba bitšago bakeng sa phološo, bontši bja bao ba nyakago go phološwa le go flatšwa ka Moya wa Gago, gona go bile ba bantši ba phagamišitšego diatla tša bona bakeng sa bolwetši.

154 Gomme re kgabotše dikhonferense, Morena, tša tšeo, godimo ga Lentšu, rena badiredi, gomme re na le ditaello go tšwa go Wena, “Rerang Lentšu.” Ke ka baka leo ba re bitšago bareri ba Full Gospel, re rera Lentšu ka moka, keletšo ka moka ya Modimo. Re a dumela O gobaditšwe ka baka la dikarogo tša rena, O tlapirigantšwe ka baka la bokgopo bja rena, kotlo ya khutšo ya rena e be e le godimo ga Gagwe, gomme ka megogoma ya Gagwe re fodišitšwe. Re a dumela go bjalo, Morena, re dudišegile ka go seo ka pelong ya rena. Ga go kgathale se ba se dirilego, le ge dibe tša bona di le tše khubedu, O tshepišitše ge ba ka tla gomme ba fana mabaka mmogo...

155 Bjale, Morena, re a lemoga ga re ne nako ye ntši gape, re bona

se sengwe le se sengwe se sepela thwi mo mojako. Gomme ga re tsebe re tla phela botelele gakaakang, renabeng, re ka no se phele go kgabola bošego, ga re tsebe. Eupša re na le tshepišo ye e šegofetšego ya Jesu a re, “Yo a kwago Mantšu a Ka, gomme a dumela go Yena yoo a Nthomilego, o ne Bophelo bjo Bosafelego, gomme a ka se tsoge a tla kahlolong; eupša o, fetile lehung go ya Bophelong.”

¹⁵⁶ Morena, ge go ka ba e ka ba eng ka go nna, bjalo ka ge ke eme fa mo phuluphithing, godimo ga lefelo le lekgethwa le moo Ebangedi e rerilwego botelele kudu, moo bahlanka ba bagolo ba Gago ba llilego go aletara ye go koloba ka megokgo, nteke, Morena, ke nyaka khonferense. Gomme O tshepišitše gore nka kgona go ba le yona le Tate ge re ka kgopela Leineng la Gago.

¹⁵⁷ Gomme yo mongwe le yo mongwe wa rena o swere dikhonferense ka gare le ka ntle, a nke re kwele khuetšo ya Bogona bja Gagwe yeo e re botšago dibe tša rena di lebaletšwe, gomme le ge di be di le bjalo ka madi, di tla ba tše tšhweu bjalo ka wulu. Gomme gosedumele ga rena, le dikgakanegokgolo, le go hloka kgahlego ga rena, le—le dikgopolo tše nnyane tša lefeela tšohle di tla feta go tloga go rena, gomme re tla ba Kereke ye kgolo, ye e kopanego ya Modimo yo a phelago, kerekeleina ye nngwe le ye nngwe mmogo, pelo ye nngwe le ye nngwe, bohle ka mmero o tee re matšhetša pele, re se ra arogana godimo ga dikokwane tša Morena Jesu le godimo ga dithuto tša Gagwe, godimo ga Moya wa Gagwe wo o re tlišago go Letšatši lela la Kahlolo. A nke re ipolelele dibe tša rena bjale, gomme di ye pele ga rena.

¹⁵⁸ Bao ba babjago le go tlaišwa, bao ke bana ba Gago, dibe tšohle di lebaletšwe, gomme di—di hlatswitšwe ka Meetseng ke Lentšu, leo ke Lentšu la karogano, goba, Meetse a karogano, Lentšu, gomme o ba arogantše, Morena, go tloga—go tloga go phošo go ya go nepagalo, gomme o ba lebaletše. A nke Moya wo Mokgethwa, thwi ka nakwana ye, Morena, o kgwathe mebele ya bona ya go babja, a nke ba tsoge go tšwa bolwetšing bja bona, ba ye ntle gosasa go ba ba go fapana, go ba mošomong le Morena felotsoko ba dira taelo ya Gagwe. E fe, Morena.

¹⁵⁹ Šegofatša modiredi yo mongwe le yo mongwe, badiši ba Gago, Morena. O Morena, šegofatša dipelo tša bona tše bohlokwa. Badiši ba mehlape ye go dikologa go kgabola naga mo, Morena, a nke dikereke tša bona di no thoma go atlega. A nke morero wa Kriste o thome go gola. E fe, Morena.

¹⁶⁰ Šegofatša modiša yo mo, ngwanešu morategi wa rena—wa rena. Re a kgopela gore O tla no mo šegofatša ka botlalo, le bašomi bohle ba gagwe, le kereke ya gagwe, le maloko a gagwe, a nke go be le makgolo a dikoketšego go kopanelo, e fe, Morena, ka baka la Bogona bja Kriste. Re lebalele sebe se sengwe le se sengwe, gomme re tšeele ka go poloko ya Gago.

¹⁶¹ Bjale, ge re sa ne dihlogo tša rena di inamišitšwe, modiša o nno sebela ka tsebeng ya ka, ge ba bao le phagamišago diatla tša lena ba nyaka šedi ya go ikgetha, ka kgonthe ba ka kgona go e hwetša ka kamoreng ya ka thoko fa. Ge o nyaka šedi ya go ikgetha, ge o ka no emelesa ka maoto a gago, wa sepelela godimo fa go la ka le letona, re tla le tšeela godimo fa ka kamoreng, bao ba hlokago šedi ya go ikgetha go tšwa go Kriste. Yoo a sa ikwelego go lekanela feela bjale gore o amogetše seo o se kgopetšego, mejako e bulegile, re tla thaba go ba le lena go tsena gore re kgone go le khansela, ge ka boleta re opela, ka go nokologa ka kgonthe, *Etla Gae*. A yeo ke ye o bego o e opela, kgaetšedi?

¹⁶² Bjale, tšwelangpele dihlogo tša lena di inamišitšwe gomme le rapele. Bjale, lena ba le phagamišitšego diatla tša lena, ba le sa ikwelego gore le no ba le se le se nyakago go tšwa go Kriste, thwi go la ka le letona, thwi fa, go ne lefelo le le lokišitšwego gore re kgone go direla. Rapelang bjale.

Ka boleta le bonolo Jesu . . .


¹⁶³ Ge le feta kgauswi, a le ka se tle thwi mo aletareng, gore ke tla ba le nnete go kgwatha yo mongwe le yo mongwe.

. . . wena le nna,
Bonang mejakong O letile gomme o šeditše,
O šeditše wena le nna.

Etla gae, etla gae,
Wena yo a lapilego, etla gae;
Ka tiišetšo, ka boleta, Jesu o a bitša,
O a bitša, O modiradibe, etla gae!

¹⁶⁴ Ka dihlogo tša lena di inamile go tšwelapele. Mohlomongwe khonferense ye nnyane e dutšego ka setulong sa gago fale e e rumme, ke thakgetše kudu go tseba gore e dirile. Ke be nka se nagane gore o be o botega go lekanela go phagamiša seatla sa gago gore o nyakile se sengwe go tšwa go Modimo, gomme morago wa se botege go lekanela go se gana ge o se fiwa. Ke a dumela o se amogetše. Modimo a le šegofatše ka mehla.

¹⁶⁵ Ge re sa dutše ka dihlogo tša rena di inamišitšwe, Ke ya go kgopela modiša bjale go bolela lentšu.

¹⁶⁶ Mogwera wa ka, go lokile bjale. 

60-0228 Dikhonferense
First Assembly Of God
Phoenix, Arizona U.S.A.

NORTH SOTHO

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org